

Bil. 5

Isnin

20 Julai 2020



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KETIGA
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Kelewatan Kelulusan Bagi Cadangan Perpindahan
Tapak SJK(T) Ladang Changkat Salak (ABD4116)
ke Tapak Baru**
 - *YB. Tuan Kesavan a/l Subramaniam (Sungai Siput)* (Halaman 1)
- **Isu Polisi Pelarian di Malaysia**
 - *YB. Tuan Chan Ming Kai (Alor Setar)* (Halaman 3)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KEDUA**

Isnin, 20 Julai 2020

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Kelewatan Kelulusan Bagi Cadangan Perpindahan Tapak
SJK(T) Ladang Changkat Salak (ABD 4116) ke Tapak Baru**

2.34 ptg.

Tuan Kesavan a/l Subramaniam [Sungai Siput]: Tuan Yang di-Pertua dan Yang Berhormat Menteri Pendidikan, Lembaga Pengelola Sekolah masih tidak mendapat kelulusan bagi cadangan perpindahan tapak SJK(T) Ladang Changkat Salak ke tapak baru seluas 1.247 hektar di Lot 3665 Mukim Kota Lama Kanan, Kuala Kangsar.

Tuan Yang di-Pertua, permohonan bagi tujuan ini telah dikemukakan ke Bahagian Perancangan dan Penyelidikan Dasar Pendidikan Kementerian Pendidikan Malaysia melalui Jabatan Pelajaran Perak sejak 16 Januari 2015. Permohonan ini ditangguhkan dengan alasan bahawa enrolmen murid sekolah ini tidak meningkat dan bakal menjadi sekolah kurang murid. Pihak sekolah memohon jasa baik Yang Berhormat Menteri agar dapat membantu mendapatkan kelulusan tersebut berdasarkan sebab-sebab seperti berikut:

- (i) Lembaga Pengelola Sekolah SJK(T) Ladang Changkat Salak memiliki sebidang tanah tiga ekar (1.247 hektar) untuk pembinaan bangunan baru. Lokasi tapak berkenaan adalah di Salak Baru di mana hampir 120 keluarga masyarakat India mempunyai rumah sendiri di kawasan perumahan sekeliling tapak baru sekolah ini. Dengan itu sudah pasti bilangan pelajar akan meningkat sekiranya sekolah ini dipindahkan ke tapak baru nanti.

- (ii) SJK(T) Ladang Changkat Salak kini mempunyai hampir 50 orang pelajar. Hampir 90 peratus pelajar berasal dari kawasan perumahan Salak Baru dan hanya 10 peratus pelajar yang berasal dari Ladang Changkat Salak.

Pihak PIBG sekolah ini telah berusaha meningkatkan bilangan pelajar sekolah dengan menyediakan kemudahan pengangkutan kepada para pelajar dari kawasan perumahan Salak Baru.

Namun, masih ada sebilangan pelajar dari kawasan perumahan tidak dapat mendaftarkan diri di sekolah ini kerana para ibu bapa menghadapi masalah dalam menyediakan pelajar ke sekolah sebelum jam 6.30 pagi setiap hari sebelum mereka bertolak ke tempat kerja. Tambahan pula, PIBG telah menyediakan khidmat van sekolah sebagai pengangkutan dan hanya mampu mengangkut sejumlah 8 hingga 12 orang pelajar setiap kali.

Alasan bahawa sekolah ini akan menjadi sebuah sekolah kekurangan murid perlulah diketepikan memandangkan sekolah ini mungkin terpaksa ditutup pada masa hadapan sekiranya kedudukan sekolah ini di Ladang Changkat Salak tidak dipindahkan ke tapak baru memandangkan tiada lagi pekerja di ladang ini dan sekolah ini bergantung kepada para pelajar yang datang dari kawasan perumahan Salak Baru. Sekian, terima kasih.

2.37 ptg.

Timbalan Menteri Pendidikan [Dato' Dr. Mah Hang Soon]: Terima kasih Yang Berhormat Sungai Siput.

Tuan Yang di-Pertua, Kementerian Pendidikan Malaysia mengucapkan terima kasih kepada Ahli Yang Berhormat Sungai Siput dan KPM ingin memberi penjelasan kepada perkara yang dibangkitkan iaitu kelewatan kelulusan bagi cadangan perpindahan tapak SJK(T) Changkat Salak ke tapak baru.

Untuk makluman Ahli Yang Berhormat, SJK(T) Changkat Salak berstatus sekolah bantuan kerajaan. KPM telah menerima permohonan daripada Lembaga Pengelola Sekolah berhubung dengan cadangan perpindahan SJK(T) Ladang Changkat Salak ke tapak baru hak milik Lembaga Pengelola Sekolah (LPS) di Lot 3665 seluas 12,470 meter persegi di Mukim Kota Lama Kanan Salak, Daerah Kuala Kangsar, Perak.

Permohonan tersebut telah diterima pada 16 Januari 2015 dan dibentangkan dalam Mesyuarat Jawatankuasa Khas Bahagian Perancangan dan Penyelidikan Dasar Pendidikan (BPPDP) mengenai Projek Pembangunan Bil. 1/2015 pada 25 hingga 27 Februari 2015. Walau bagaimanapun,

jawatankuasa khas ini mendapati permohonan tersebut perlu ditangguhkan berdasarkan justifikasi seperti berikut:

- (i) Bahawa pihak LPS hendaklah mengemukakan maklumat berhubung potensi untuk berlakunya peningkatan enrolmen di kawasan tersebut bagi memastikan sekolah ini tidak menjadi sekolah kurang murid (SKM) pada masa hadapan; dan
- (ii) Bahawa pihak LPS dan sekolah perlu mendapatkan persetujuan 100 peratus ibu bapa secara bertulis berhubung cadangan perpindahan sekolah.

Untuk makluman Ahli Yang Berhormat, berdasarkan rekod KPM, sehingga kini pihak LPS dan sekolah masih belum mengemukakan maklumat yang diputuskan dalam mesyuarat.

■1440

Oleh yang demikian, pihak LPS dan sekolah perlu mengemukakan semula permohonan pindah lokasi SJK(T) Ladang Changkat Salak melalui Jabatan Pendidikan Negeri Perak. Permohonan perlu disertakan dengan dokumen lengkap termasuklah salinan geran tapak baru yang dicadangkan, maklumat berhubung potensi berlakunya peningkatan enrolmen di lokasi baru dan persetujuan semula ibu bapa untuk pertimbangan KPM. Dokumen tersebut perlu dikemukakan kepada KPM bagi membolehkan Jawatankuasa Khas BPPDP Mengenai Projek Pembangunan mempertimbangkan semula permohonan berkenaan mengikut prosedur yang sedia ada.

Sehubungan itu, pihak KPM berharap pihak LPS dapat memastikan permohonan cadangan perpindahan SJK(T) Ladang Changkat Salak ke tapak baru dapat dilaksanakan mengikut syarat dan prosedur yang ditetapkan. Ini bagi membolehkan KPM menimbang semula permohonan tersebut sewajarnya. Sekian, terima kasih.

Isu Polisi Pelarian di Malaysia

2.41 ptg.

Tuan Chan Ming Kai [Alor Setar]: Terima kasih Tuan Yang di-Pertua. Yang Berhormat Menteri Dalam Negeri, saya ingin menarik perhatian pihak kementerian ke atas isu polisi pelarian (*refugee*) dengan izin. Malaysia adalah di antara negara yang masih belum meratifikasikan Konvensyen Pelarian 1951

Bangsa-bangsa Bersatu. Maka terdapat banyak isu di mana pelari ataupun pemohon suaka akan ditahan sebelum mereka mendapat kad UNCHR.

Oleh kerana sehingga kini hanya ibu pejabat UNHCR di Malaysia yang boleh memproses permohonan kad UNHCR tersebut. Maka mereka yang belum sempat mengemukakan permohonan menghadapi risiko ditahan dan dituduh di bawah Akta Imigresen serta dihukum penjara sebelum dihantar ke depot. Minta Menteri menjelaskan mengapa amalan rutin bagi UNHCR untuk membuat semakan identiti serta permohonan kad UNHCR bagi tahanan di depot telah berhenti.

Sejauh mana kerjasama telah diberi oleh pihak KDN, imigresen dan Jabatan Penjara kepada UNHCR untuk mempercepatkan proses pengenalpastian identiti pelarian bagi mereka yang di bawah tahanan depot, reman atau penjara. Proses ini perlu dikemaskinikan dan dipercepatkan untuk mengurangkan bebanan ke atas kerajaan atas masalah sesakan di tempatan tahan. Minta Menteri menyatakan berapa kali semakan yang telah dibenarkan kepada UNHCR untuk membuat semakan tersebut di setiap depot, tempat reman dan penjara sejak 2018.

Yang Berhormat Menteri, minta nyatakan berapa tahanan reman bawah Akta Imigresen seksyen 51(5)(b) dan banduan dipenjarakan di bawah tuduhan Akta Imigresen Seksyen 6(1)(c) dan 15(1)(c) mengikut kaum dan negara asal tertuduh. Minta Menteri nyatakan juga berapa jumlah tahanan di setiap depot serta kaum dan negara asal masing-masing. Minta menjelaskan dari segi bebanan kos kehidupan hari, berapakah perbelanjaan yang diperlukan untuk seorang tahanan di bawah depot, reman dan penjara. Minta Menteri senaraikan kapasiti depot dan penjara sedia ada dan sejauh mana jumlah penghuni telah *over crowded* dengan izin atas kapasiti sedia ada.

Rohingya merupakan etnik pelarian yang terbesar di Malaysia. Minta Menteri menyatakan berapa jumlah Rohingya yang masih dalam tahanan penjara atau depot dan berapa di antara mereka telah ditemu duga atau membuat permohonan status pelarian melalui UNHCR. Mengapa kerajaan tidak memulakan proses semakan identiti oleh UNHCR terhadap mereka semasa ditahan tetapi hanya membenarkan semakan tersebut dibuat selepas direman atau dipenjarakan bahkan ada yang selepas habis dipenjarakan.

Mohon Menteri menyatakan apakah perkembangan terkini antara perbincangan KDN dengan UNHCR atas perjanjian *data sharing* dengan izin dan tindakan susulan yang akan diambil selepas ini. Sekian, terima kasih.

2.44 ptg.

Timbalan Menteri Dalam Negeri [Dato' Sri Dr. Haji Ismail bin Haji Mohamed Said]: *Bismillahir Rahmanir Rahim*. Terima kasih Tuan Yang Di Pertua dan terima kasih Ahli Parlimen Alor Setar yang bertanya. Tuan Yang di-Pertua, sepertimana Ahli Yang Berhormat sedia maklum, Malaysia bukan negara anggota kepada Konvensyen Mengenai Status Pelarian 1951 (Konvensyen 1951) dan Protokol Mengenai Status Pelarian 1967 (Protokol 1967).

Untuk makluman Ahli Yang Berhormat, penangguhan akses UNHCR untuk proses penentuan status pelarian dan kawalan yang dikenakan oleh kerajaan di Depot Tahanan Imigresen dan penjara dilaksanakan berdasarkan perundangan sedia ada untuk mengelakkan berlakunya pemberian status pelarian kepada individu yang tidak memenuhi kelayakan seperti mempunyai latar belakang yang negatif, rekod jenayah, kecenderungan terhadap aktiviti-aktiviti subversif dan kriteria-kriteria yang boleh memberikan ancaman kepada keselamatan dan juga kedaulatan negara.

Dalam hubungan ini, pihak kerajaan sentiasa mengutamakan keselamatan dan ketenteraman awam sebelum memberikan sebarang status atau kemudahan kepada mana-mana warganegara asing di Malaysia, termasuklah tahanan dan banduan yang ingin mendapatkan status pelarian daripada UNHCR. Malahan, pihak UNHCR juga menjelaskan bahawa proses penentuan status pelarian adalah suatu proses yang terperinci serta tidak boleh dilaksanakan secara terburu-buru dan sewenang-wenangnya.

Berkenaan dengan pertanyaan statistik tahanan di bawah Akta Imigresen. Yang Berhormat, saya akan mengemukakan senarai ini kerana terlalu panjang. Masa kita ada tujuh minit setengah sahaja untuk menjawab.

Bagi pertanyaan Yang Berhormat berhubung kos tahanan dan banduan, secara purata kos keseluruhan penyelenggaraan seorang banduan di penjara adalah pada kadar RM50 sehari manakala kos seorang tahanan di Depot Tahanan Imigresen adalah RM90 sehari. Kos ini melibatkan antaranya penyediaan makanan, perubatan, kemudahan asas, bekalan air dan elektrik, program pemulihan, pakaian, peralatan penjagaan diri, penyenggaraan depot dan penjara, elaun dan gaji pegawai yang bertugas serta lain-lain.

Tuan Yang Di Pertua, bagi pertanyaan Ahli Yang Berhormat berikutnya, statistik yang direkodkan oleh Jabatan Penjara Malaysia pada 1 Julai 2020 menunjukkan terdapat seramai 60,983 banduan sedang menjalani hukuman di penjara seluruh negara manakala jumlah kapasiti penjara di seluruh negara adalah seramai 47,650 banduan, memang ada *over crowded*. Punca utama

kesesakan di penjara adalah kerana kadar kemasukan banduan yang meningkat terutamanya banduan warganegara asing yang pada ketika ini merupakan 20 peratus daripada jumlah banduan yang sedia ada iaitu sejumlah 13,319 banduan dari keseluruhan banduan iaitu 60,983 banduan.

Manakala bagi tahanan di Depot Jabatan Imigresen Malaysia pula, jumlah tahanan pada 1 Julai 2020 adalah seramai 15,163 orang tahanan di Depot Tahanan Imigresen seluruh negara berbanding kapasiti depot iaitu seramai 12,530 tahanan sahaja pada satu-satu masa. Faktor jumlah tahanan melebihi kapasiti depot adalah berpunca daripada proses penghantaran pulang tahanan ke negara asal yang terjejas akibat kawalan kemasukan yang dilaksanakan oleh hampir kesemua negara di seluruh dunia susulan penularan wabak COVID-19.

Bagi menangani masalah kesesakan atau kepadatan di penjara dan depot, Kementerian Dalam Negeri melalui Jabatan Penjara Malaysia dan Jabatan Imigresen Malaysia mengambil beberapa langkah proaktif. Daripada jumlah keseluruhan banduan di penjara pada 1 Julai 2020, terdapat 15 orang banduan etnik Rohingya yang mana 14 orang adalah banduan reman dan seorang banduan etnik Rohingya tersebut kini ditahan di Sekolah Henry Gurney selaras dengan peruntukan di bawah Akta Kanak-kanak 2001. Manakala terdapat 1,340 orang tahanan etnik Rohingya di Depot Tahanan Imigresen yang dikenal pasti oleh Jabatan Imigresen Malaysia pada 1 Julai 2020.

Untuk perkembangan terkini bagi menangani isu ini, KDN menyedari bahawa isu pelarian merupakan perkara yang sering dibangkitkan di platform antarabangsa, Kerajaan sentiasa menitikberatkan kerjasama antara pihak kerajaan dengan pihak UNHCR bagi menambah baik pengurusan PATI yang memegang kad UNHCR di dalam negara.

Pihak kementerian bersama-sama Majlis Keselamatan Negara (MKN) selaku peneraju dan pemilik dasar berkaitan PATI yang memegang kad UNHCR di Malaysia sedang meneliti cadangan penambahbaikan dari aspek prosedur, tatacara dan kawalan khususnya berkaitan penentuan status pelarian yang membantu mekanisme pengurusan PATI yang memegang kad UNHCR yang efisien.

Kerajaan pada ketika ini sedang memperhalusi kebolehlaksanaan perkongsian maklumat dengan pihak UNHCR yang mana sekiranya dipersetujui akan memberikan kerajaan akses kepada maklumat PATI yang memegang kad UNHCR dan pemohon suaka yang berada di Malaysia. Sebagai hala tuju selanjutnya, kerajaan turut mengkaji cadangan penglibatan

kerajaan dalam proses penentuan status pelarian yang pada masa ini dilaksanakan sepenuhnya oleh UNHCR.

Meskipun bukan negara anggota kepada Konvensyen 1951 dan Protokol 1967, terdapat keperluan di pihak kerajaan untuk mengawal selia keberadaan PATI yang memegang kad UNHCR di dalam negara bagi memastikan tidak timbul risiko keselamatan di kalangan individu yang tidak diketahui latar belakangnya. Terima kasih Tuan Yang di-Pertua.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri atas jawapan itu. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang esok Selasa, 21 Julai 2020.

[Kamar Khas ditangguhkan pada pukul 2.52 petang]